

te Christi richtig hat/ vnd in der sache selbst einig ist; So liegt hieran nicht viel/ man sehe in dieser Rede allein eine improprietatem Logicam, oder zugleich auch einen tropum Rhetoricum. Es gibt oder nimbt auch der sache an vnd für sich selbst nichts/ man nenne den tropum, wie man wolle / vnd sehe ihn / in was für einem wort man wolle.

Aus welchem allen nun sonnenklar erscheinet/ daß jener seits Evangelische/ die sich Lutherisch nennen/ ganz vnd gar keine ursach haben/ vmb vnd von wegen der Auslegung der Worte Christi; Das ist mein Leib/ etc. so wir auff vnser seite führen/ vns die Geistliche Brüderschafft abzuschlagen / vnd vns zu verkäusern vnd zu verdammten.

C A P. 19.

Ablehnung der übrigen Argumenten/

so D. Mentzer, vnd M. Zuckerman ferners/

wegen vnser Lehr vom Abendmal/ wider

vns vorbringen.

Der obgesetzte Einwürffe vom Sacramentlichen Essen vnd Trinken/ vnd der Auslegung der Worte Christi im Abendmahl / bringen auch D. Mentzer in seiner Erinnerung/ vnd M. Zuckerman in seiner Antwort andere mehr sachen wider vns für/ Welche wir auff's kürzeste der gebühr ablehnen vnd beantworten wollen.

Erstlich gedenckt Mentzer pag. 26. Es finden sich an vnser Lehr von der Geistlichen Verfassung des Glaubens noch grosse vnd schwere Mängel/ die er hie bevor in einer sonderlichen disputation gezeigt vnd widerlegt habe.

Antwort. 1. Mentzeri disputation, darauff er sich allhier referirt vnd zeucht / hab ich meines wissens nicht. Derentwegen ich mich auch vmb so viel weniger vmb dasjenige/ so er vielleicht in solcher

cher